

- *1. وزیر اعظم نریندر مو دی پہلک اپنا نیوزی لینڈ غا ہم منصب کرسٹوفر لگزون غے ہمراہ رائزینا مذاکرات 2025 غو افتتاح کریں گا۔
- *2. لشکر طیبہ غو اک دہشت گرد ابو قتال پاکستان غا سندھ صوبہ غا جہلم علاقہ مانہہ ہلاک ہو گئے۔
- *3. پاکستان غا صوبہ بلوچستان مانہہ سلامتی دستاں نانہہ لے جا رہی اک بس ور کیا گیا جان چک حملہ مانہہ سلامتی دستاں غا 12 اہلکار ہلاک جد کہ 26 دوجا زخمی ہو گیا ہیں۔
- *4. ہفتہ غا اخیر مانہہ چھٹیاں غی وجہ نال ماتا ویشنو دیوی غی گفہ غا درشن کرن آلا یا تریاں غی تعداد مانہہ خاصو با بدو درج کیو گئے۔
- *5. تے جموں کشمیر پولیس نے میرا تھون دوڑ سال 2025 غو انعقاد کیو ہے۔ جس مانہہ 3 ہزار کھلاڑیاں نے شرکت کی ہے۔

خبراں غی تفصیل نال پہلاں باغ علی طاہر۔

PM Raisina Dialogue

وزیر اعظم نریندر مو دی پہلک نوی دہلی مانہہ اپنا نیوزی لینڈ غا ہم منصب کرسٹوفر لگزون غے ہمراہ ریزینا مذاکرات سال 2025 غو افتتاح کریں گا۔ ریزینا مذاکرات غو کل تین شروع ہون آلو یوہ 10 ووں شمارو آئندہ 19 مارچ توڑی جاری رہے گا۔ ریزینا مذاکرات بھارت غی جغرافیائی سیاست تے جغرافیائی معیشت ور مبنی اک بڑی کا نفرنس ہے۔ جس مانہہ عالمی برادری نانہہ درپیش بڑی للکاراں سنگ نمڑن با رہے غور کیو جائے۔ ہر سال سیاست، کاروبار، میڈیا تے سول سماج غی نمائندگی کرن آلا لیڈر نوی دہلی مانہہ جمع ہو غے اس کا نفرنس غے دوران عالمی صورتحال تے آپسی تعاون غا موقعہ تلاش کرن سمیت بکھ بکھ معاملہ گا نبیڑا غی کوشش با رہے صلاح مشورہ مانہہ شرکت کریں۔ یاہ کا نفرنس ابزورر رسرچ فاؤنڈیشن غی طرفوں وزارت خارجہ غا تعاون سنگ منعقد کی جائے۔ اسے دوران نیوزی لینڈ غا وزیر اعظم کرسٹوفر لگزون 5 روز غا اپنا بھارت دورہ ور اج دوپہر بعد نوی دہلی پُج گیا ہیں۔ اُن گا وفد مانہہ اُن غے ہمراہ آن آلاں مانہہ وزیر، سننیر آفسر، کاروباری شخصیات، میڈیا غا نمائندہ تے بھارتی نژاد برادری غا افراد شامل ہیں۔

Abu Qatal Killed

لشکر طیبہ تنظیم غا دہشت گرد ابو قتال المعروف قتال سندھی نانہہ گذشتہ رات سندھ پاکستان غا جہلم علاقہ مانہہ کُجھ بے پشانو بندوق برداران نے گولی مار غے ہلاک کر دتو ہے۔ ابو قتال بے حد مطلوب دہشت گرد تھو، جہیڑو جموں کشمیر مانہہ کئی حملات غی منصوبہ بندی غو ذمہ دار رہیو ہے۔ یوہ دہشت گرد حافظ سعید غو قریبی ساتھی دسیو گیو ہے، جہیڑو پیو پلز اینٹی فیسسٹ فورس تے دی ری سسٹنٹ فورس نامی دہشت گرد تنظیمان غی قیادت کرن مانہہ وی ملوث تھو۔

Dy CM-Devp Works

نائب وزیر اعلیٰ سریندر کمار چودھری نے لوکان غی بہبود غی خاطر جاری ترقیاتی پروجیکٹان غا کم مانہہ تیزی لیان بارے سرکار غا عہد نانہہ دہرایو ہے۔ نائب وزیر اعلیٰ نے اس گل غو اظہار اج نو شہرہ قصبہ غا اپنا دورہ غے دوران بکھ بکھ ترقیاتی کمان غی پیش رفت غو جائزولیتان واں کیو۔ انہاں نے قصبہ غا آشرم، ٹاؤن ہال، شاپینگ کمپلیکس تے ہسپتال غی عمارت غو دورو لایو تے عوامی مفاد غا ترقیاتی کمان مانہہ تیزی لیان تے ان غی ہر وقت تکمیل ور زور دتو۔ اپنا دورہ غے دوران انہاں نے تعمیراتی کمان گا معیار غو معائنو کیو تے متعلقہ ایجنسیاں ور زور پایو جے وے ان کمان نانہہ ویلے سر مکمل کریں۔ ترقیاتی کمان غی عمل آوری تے اُن غا معیار بارے نائب وزیر اعلیٰ نے مقامی افراد تیں وی جانکاری حاصل کی۔

Poonch

ضلع پونچھ غا کھنیتز علاقہ مانہہ بھارتیہ فوج غی 39 راشٹریہ رائفلز نے گراں مانہہ رہ رہیا غریب لوکان مانہہ مفت راشن اور ضروری کھان غی چیزان نانہہ تقسیم کیو۔ یوہ آغاز بھارتیہ فوج غی طرفوں مقامی لوکان غی بہتری غا سلسلہ مانہہ چایو گیو، جس غو مقصد اے جے اس علاقہ مانہہ کائے افراد وی بھوکو نہ سوئے، اس کھانا غی کٹ مانہہ لوکان غی ضرورت پوری کرن غی ضروری چیزان غے نال نال چاول، آٹو، دال اور کھانو پکان آلا تیل جیسی اہم چیز شامل این۔ اس موقعہ ور بولتان واں اک بسنیک نے بھارتیہ فوج گا اس آغاز غی سراہنا کرتاں واں کہیو۔۔ بانٹ۔

CRPF Medical Camp

سی آر پی ایف غی 121 ویں بٹالین غی طرفوں سیوک ایکشن پروگرام غے تحت ضلع کٹھوعہ غا جگت پور گراں مانہہ مفت طبی تشخیص غو اک کیمپ منعقد کیو گیو۔ یوہ کیمپ سی آر پی ایف غا ڈپٹی کمانڈینٹ راکیش کمار غی نگرانی مانہہ منعقد ہوؤ۔ اس کیمپ غے دوران سی آر پی ایف تے ضلع ہسپتال کٹھوعہ تیں آیا ڈاکٹران غی ٹیم غی طرفوں 4 سو مریضان غا بکھ بکھ بیماریاں بارے تشخیصی ٹیسٹ کیا گیا۔ کیمپ غے دوران مریضان نانہہ مفت دوائیں وی تقسیم کی گئیں۔ اس کیمپ تیں خصوصی طور ور چھوٹا بچاں تے بزرگ مریضان نانہہ فائدو پُجیو ہے۔

جھپٹو اُن گا کہراں غے نزدیک منعقد کیو گئو تھو۔ اس موقعہ ور بولتاں واں سی آر پی ایف غی 121 ویں ہٹالین غا ڈپٹی کمانڈینٹ راکیش کمار نے دسیو جے سیوک ایکشن پروگرام غے تحت کئی سرگرمیاں منعقد کی جا رہی ایں۔ اُن غو کہنو تھو۔ بائٹ۔

مزید خبراں نال جاویدچودھری۔ ور اُس تیں پہلاں یوہ پیغام۔(یہ خبر تم آکاشوانی جموں تیں سُن رہیا ہیں، تے یہ خبر مہاری ویب سائٹ نیوز آن آئیر ڈاٹ گو ڈاٹ ان ور وی دستیاب ہیں، اس (تیں یہ خبر مہاری مو بائل ایپ تے ڈی ٹی ایچ ور وی دستیاب ہیں

Pak Army Attacked

پاکستان گا صوبہ بلوچستان غا نوشکی علاقہ مانہ این 40 شاہراہ ور پاکستانی سلامتی دستاں غا اک قافلہ ور ہوا اچانک حملہ مانہ 12 اہلکار ہلاک جد کہ 26 دوجا زخمی ہو گیا ایں۔ فرینٹئر کنسٹابلری ور کیا گیا اس حملہ غے بعد ہسپتال مانہ ہنگامی صورتحال لاگو کی گئی ہے تے ایف سی صدر دفتر غے اندر تے باہر آتی جا تی ایمبولینس گڈیں دیکھی گئیں ایں۔ اُنگاں اس خوفناک حملہ غی ذمہ داری بلوچ لیبریشن آرمی بی ایل اے نے قبول کرتاں واں کہتوں کہٹ 90 فوجی اہلکاراں نانہ ہلاک کرن غو دعوو کیو ہے۔ بی ایل اے غا اس دعوئی غو پاکستانی عہدیداراں غی طرفوں اجوں توڑی کوئی رد عمل ظاہر نہیں کیو گئو ہے۔

SMVD Reasi

ہفتہ گا اخیر مانہ چھٹیاں غی وجہ نال شری ماتا ویشنو دیوی غا درشن کرن واسطے عقیدت منداں غو خاصو باہو دیکھیو جا رہیو ہے۔ مُلک پھر تیں ہزاراں غی تعداد مانہ یا تری پوتر گُفا ور درشن کرن آریا ایں، جنہاں نے ماحول نانہ روحانی طور ور تہوار بنا دتو ہے۔ متی بھیڑ ہون غے باوجود شری ماتا ویشنو دیوی شرانین بورڈ نے یا تریاں غا آرام اور سہولیات غی خاطر بہتر انتظامات نانہ یقینی بنایو ہے۔ اس دوران عقیدت منداں نے موثر ہجوم غا انتظام، طبی سہولیات اور بلا کسی رکاوٹ غے درشن انتظامات ور تسلی غو اظہار کیو ہے۔ شرانین بورڈ غا حُکام نے عقیدت منداں تیں گزارش کی ہے جے ویں کسی پریشانی تیں پوتر گُفا غا رہنما خطوط ور عمل کریں اور حُکام نال تعاون کریں۔۔۔ بائٹ۔

PM-MKB

وزیر اعظم نریندر مو دی مُلک تے بیرون مُلک رہ رہیا بھارتی شہریاں سنگ آئندہ 30 مارچ نانہ آکاش وانی ور من کی بات پروگرام غا اپنا ماہانہ شمارہ مانہ اپنا خیالات سانجہ کریں گا۔ لوگ اپنا خیالات تے تجویز ٹول فری نمبر 1800117800 ور ڈائل کر غے روانہ کر سکیں۔ اس توں علاوہ نریندر مو دی ایپ یاہ فر مائی گوو اوپن فورم ور وی اپنا خیالات تے تجویز روانہ کی جا سکیں۔ یہ تجویز اس مہینہ غی 28 تاریخ توڑی ہی قابل قبول ویں گی۔ یوہ پروگرام آکاش وانی، دور درشن، اے آئی آر نیوز ویب سائٹ تے نیوز آن اینر مو بائل ایپ ور نشر تے ٹیلی کا سٹ کیو جا نے گو۔ اس توں علاوہ یوہ پروگرام اے آئی آر نیوز، ڈی ڈی نیوز تے وزیر اعظم غا دفتر تے اطلا

عات و نشریات غی وزارت غا یوٹیوب چینل ور وی براہ راست نشر تے ٹیلی کاسٹ کیو جائے گو۔ آکاش وانی اس پروگرام غی ہندی نشریات غے فوراً بعد اس نانہ علا قانی زبانان مانہ وی نشر کرے گو۔

Prasar Bharati Award

نوی دہلی مانہ ہاکی انڈیا غا ستواں سالانہ ایوارڈز غی تقریب غے دوران سال 2024 مانہ بہترین کا رکردگی غا اعتراف مانہ پرسار بھارتی نانہ ہاکی انڈیا جمان لعل شرما ایوارڈ سنگ نوازیو گیو ہے۔ یوہ اعزاز ہاکی غا فروغ اور نشریات مانہ پرسار بھارتی غی انتھک کوششاں غی نشاندہی کرے۔ تقریب مانہ ہاکی انڈیا نے 1975 غا عالمی کپ غا فاتح ٹیم غا اراکین نانہ ہاکی انڈیا غا میجر دھیان شند لا ئف ٹائم اچیو منٹ ایوارڈ غے نال 50 لکھ روپیاں غا نقد انعام نال وی نوازیو۔

Jammu Marathon

جموں کشمیر پولیس نے کامیابی سنگ جموں میراتھون 2025 ”رن فار یونٹی“ غی میزبانی کی۔ یوہ پروگرام سوک ایکشن پروگرام غے تحت گلشن گراؤنڈ جموں مانہ منعقد ہوؤ۔ اس میراتھون پروگرام مانہ مختلف ریاستاں اور علاقان تیں تعلق رکھن آلا 3 ہزار تیں متا حصولین آلا کھلاڑیاں جن مانہ تمام عمر غا گروپاں بشمول اسکول گا بچاں، سابق فوجیاں اور فٹنس غا شوقین افراد نے حصو لیو۔ اس دوڑ غو رستو 21 کلو میٹر ہاف میراتھون جس غو آغاز گلشن گراؤنڈ تیں لے غے ہل ویو ہونڈہ بجالتا کراسنگ تک اور 10 کلو میٹر، 5 کلو میٹر، 2 کلو میٹر غا نکا فاصلہ مختلف عمر غا افراد واسطے طے کیا گیا تھا۔ 21 کلو میٹر ہاف میراتھون مانہ فیروز پور پنجاب غا منجیت سنگھ نے پہلو مقام حاصل کیو۔ جد کہ 10 کلو میٹر سڑک دوڑ مانہ پہلو درجو کالسریاں مانہ اتر پردیش غی سویتا پال نے حاصل کیو۔ اسے دوران 10 کلو میٹر سڑک دوڑ لڑکاں غی فہرست مانہ پروین کمار جہیڑا چینی غا بسنیک این نے پہلو مقام حاصل کیو جد کہ جو ننیر سڑک دوڑ مانہ کالسریاں مانہ سولیکھا نے پہلو مقام حاصل کیو۔ اس دوران شرکتداراں نے کہیو۔ پائٹ۔۔
